

Lugete, o Veneres Cupidinesque,
et quantumst hominum venustiorum!
Passer mortuus est meae puellae,
passer, deliciae meae puellae,
quem plus illa oculis suis amabat:
nam mellitus erat suamque norat
ipsam tam bene quam puella matrem,
nec sese a gremio illius movebat,
sed circumsiliens modo huc modo illuc
ad solam dominam usque pipiabat.
Qui nunc it per iter tenebricosum
illuc, unde negant redire quemquam.
At vobis male sit, malae tenebrae
Orci, quae omnia bella devoratis:
tam bellum mihi passerem abstulistis.
O factum male, quod, miselle passer,
tua nunc opera meae puellae
flendo turgiduli rubent ocelli! CATUL.

Amabo, mea dulcis Ipsitilla,
meae deliciae, mei lepores,
iube ad te veniam meridiatum.
(...) CATUL. XXXII

Dianae sumus in fide
puellae et pueri integri:
Dianam pueri integri
puellaeque canamus. CATUL. XXXIV

Ille mi par esse deo videtur,
ille, si fas est, superare divos,
qui sedens adversus identidem te
spectat et audit
dulce ridentem, misero quod omnes
eripit sensus mihi: nam simul te,
Lesbia, aspexi, nihil est super mi
vocis in ore
lingua sed torpet, tenuis sub artus
flamma demanat, sonitu suo
tintinant aures geminae, teguntur
lumina nocte.
otium, Catulle, tibi molestumst:
otio exsultas nimiumque gestis:
otium et reges prius et beatas
perdidit urbes. CATUL. LI

Caeli, Lesbia nostra, Lesbia illa,
illa Lesbia, quam Catullus unam
plus quam se atque suos amavit omnes,
nunc in quadriuiis et angiportis

glubit magnanimos Remi nepotes. CATUL. LVIII

Odi et amo. quare id faciam, fortasse requiris.
Nescio, sed fieri sentio et excrucior. CATUL. LXXXV

Nulla potest mulier tantum se dicere amatam
vere, quantum a me Lesbia amata meast.
Nulla fides ullo fuit umquam in foedere tanta,
quanta in amore tuo ex parte reperta meast. CATUL. LXXXVII

Lesbia mi dicit semper male nec tacet umquam
de me: Lesbia me dispeream nisi amat.
Quo signo? quia sunt totidem mea: deprecor illam
assidue, verum dispeream nisi amo. CATUL. XCII

Mentula moechatur. 'moechatur mentula?' certe.
'hoc est quod dicunt: ipsa olera olla legit.' CATUL. XCIV

Mentula conatur Pipleum scandere montem:
Musae furcillis praecipitem eiciunt. CATUL. CV